

DE

CONGRVO DELECTV
POTVLENTORVM
 IN MORBORVM CVRATIONE
 PERQVAM NECESSARIO,

DIVINI NVMINIS AVSPICIIS

ET

GRATIOSI MEDICORVM ORDINIS CONSENSV

P R A E S I D E

D. ANDREA ELIA BVCHNERO

SACRI ROMANI IMPERII NOBILI,

POTENTISSIMO PRVSSIAE REGI A CONSILIIS INTIMIS,
 MEDICINAE ET PHILOSOPHIAE NATVRALIS PROFESS. PVBL. ORDINARIO,
 IMPERIALIS ACADEM. NATVR. CVRIOSOR. PRAESIDE
 ET COMITE PALAT. CAESAREO,

PRO GRADV DOCTORIS

SVMMISQVE IN MEDICINA HONORIBVS ET PRIVILEGIIS
 DOCTORALIBVS LEGITIME IMPETRANDIS,

D. IVNII, A. S. R. cldccxxxix.

H. L. Q. C.

IN REGIA FRIDERICIANA

DISPVTABIT

CHRISTIAN. GOTTHOLD GREIFFENHAGEN,

COTBVSIQ - LV SATVS.

HALAE MAGDEBVRGICAE,

TYPIS IOANNIS CHRISTIANI HENDELII, ACAD. TYPOGR.



DISSERTATIO INAUGVRALIS MEDICA
DE
CONGRVO DELECTV
POTVLENTORVM
IN MORBORVM CVRATIONE
PERQVAM NECESSARIO.

PROOEMIUM.



Nec vitam humanam diu persistere, nec sanitatem, auro quovis pretiosiore, conservari, nec morbos, sat crebro corpus humanum invadentes, in salutem aegrotantium cedere posse sine POTVLENTORVM adsumptione, fore, qui neget, credo neminem. Ipsam corporis humani fabricam, purpureum ad vitam necessarium laticem, ipsasque functiones vitam & sanitatem conservantes, potulentorum adsumptionem requirere, quilibet, haec paulo attentius considerans, perspiciet. Partes corporis humani durissimas e fluidis ortum ducere, & sanguinem ceterosque ex illo provenientes humores continuis, vita durante, motibus immutari, imminui & in vapores resolvi, neminem Medicorum fugit. Nunquam igitur soli-

dae in corpore humano partes produci, & fluida, ad vitam quam maxime necessaria, conservari potuissent, nisi homini a summo & sapientissimo eius conditore facultas POTULENTA ingerendi fuisset concessa. Miserrimus sane ac deplorandus mortalium existeret status, hac si destituti essent potulenta ingerendi facultate; quis enim eorum vita diu frui, quis firma sanitate gaudere potuisset? Miserrima sane conditio illorum, qui, diu potulentis destituti, siti intensa premuntur, luculenter ea, quae diximus, comprobare potest. Cruciatus insignes, corporis extenuatio, ingens virium iactura, reliquaque symptomata setim diu perpeßam subsequencia, quid aliud denotant, quam potulenta adsumendi necessitatem aequae ac utilitatem? Medicorum haud pauci hinc, firmioribus suffulti rationibus, obtendunt, sexum sequiorem prae potiori gravioribus & pluribus cruciari morbis, ex ea potissimum ratione, quod parcius isto potulenta adsumat. Eheu! quae tunc illius facies esset, si nulla plane adsumeret? Aegrotantes, praecipue vero morbis insigni aestu stipatis laborantes, aegre immo rarissime sanitatem recuperare, potulenta dum parcius vel raro adsumunt, quamplurimae Practicorum celeberrimorum testantur observationes.

Medicis igitur parum, vel plane nihil spei in aegrorum curatione remaneret, si illis nulla potulentorum specie subvenire possent; optima sane alias medicamina nil proficerent nullumque aegrotis adferrent levamen, quippe sine potulentis haec sanitatis praesidia aegre ad ventriculum, multo minus ad massam perve-

pervenirent sanguineam. Maxime exinde potulentorum adsumptionem hominibus quibusvis sanis & aegrotis, immo magis necessariam esse ciborum ingestione, non est quod multis probemus. Exemplum hominum quorundam, qui sine cibis vixerunt, & observationes multorum aegrotantium, qui feliciter sine ciborum adsumptione convaluerunt, id luculentius testantur. Nescio autem, an unquam quis legerit vel audiverit, hominem sine potulentis vixisse, aut aegrotos sine usu potulentorum convaluisse, manifesto sane indicio, tantam esse potulenta adsumendi necessitatem, ut nullus mortalium sine illorum usu sanitatem conservare & vitam continuare valeat. Nec obstat, si quis regeret, cricetos, mures arvenses aliaque animalia hyberno tempore nihil fluidi assumere, vita tamen superstite; nullus enim certissime potest evincere, quod haec animalia e suis speluncis & cavernulis non soleant prodire & nivem vel aquam congelatam ingerere; sique etiam verissimum esset, haec animalia ad tempus quoddam sine fluidorum adsumptione posse vitam conservare, nullo tamen iure ab iisdem ad homines concludi potest, quod hi pariter sine sanitatis dispendio potulentis per longum temporis spatium, multo minus per vitae decursum, carere valeant.

Maximam quidem, ratione potulentorum adsumptionis, inter homines esse diversitatem, dum alii copiosius & frequentius, Bonesi ad instar, (quem copiosa potulentorum ingurgitatione omnes alios homines exsuperasse, antiquiores referunt,) alii e contra parcius & varius ista adsumunt, lubens concedo; interim ta-

men a quibusvis potulenta adsumi, nullumque mortalium illis carere posse, quilibet, experientiam tanquam optimam rerum magistram respiciens, concedet. Nec aliter fieri potest, quin ob insignem, quam corpori humano praestant, utilitatem, necessaria isti existant. Cum enim sanguinis fluiditas a potulentis quoad maximam partem dependet, haec vero partium flexibilitatem, adiuvante calore, vasorum permeabilitatem reliquasque functiones promovet & in vigore conservat, fit inde, ut homo sine sanitatis vitaeque detrimento illis carere nequeat. Si quis autem maximam subiectorum diversitatem considerat, statim adparet, non unum idemque potulentum omnibus & singulis posse convenire, sed potius pro circumstantiarum varietate potulentum cuius conveniens esse seligendum. Id maxime necessarium videtur in morbis, ut Medici, dum iuxta HIPPOCRATIS Sect. II. Aph. II. facilius est potu refici, quam cibo, aegris potum decentem & adpropriatum, a quo magna felicitis curationis pars dependet, praescribant & commendent, quippe qui, omnem saepe cibum averfantes, unicum solatium in potulentis quaerunt.

Quae cum ita sunt, suasu Illustr. DN. PRAESIDIS impulsus, praesenti specimine inaugurali delectus potulentorum congrui necessitatem pariter ac utilitatem summam, pro curatione morborum adiuvanda, pro virium modulo specialius ostendere constitui. Faxit summum Numen, ut qualescunque hi conatus in sui maxime gloriam & aegrotantium cedant salutem.



§. I.



Quoniam ab hominibus, cuiuscunque aetatis, sexus, temperamenti & loci sint, potulenta adsumuntur, supervacaneum quodammodo videtur in limine huius Dissertationis explicare, quid per *potulenta* intelligatur: verum, si iuxta Romanae eloquentiae principis effatum omnis bona a definitione incipit tractatio, merito nobis incumbit, ut eadem via incedamus. Ad distinctum igitur conceptum de potulentis obtinendum, necessarium tantummodo est, ut ad nosmet ipsos attendamus, si potulenta adsumimus: observamus tunc, corpus fluidum ore adsumi & sensim exspiratione succedente deglutiri. Sicuti autem corpora ista fluida vel calida, vel frigida sunt; ita etiamprehendimus, calida, quae forbillando adsumuntur, cum inspiratione, & frigida praevia illa ore recipi, sensimque dein subsequente exspiratione, quam sub bibendo factam mox succedens, si a potu desistimus, inspiratio manifestat, deglu-

deglutiri. Conveniunt igitur in genere omnia potulenta in eo, quod, ore adsumpta, sensim subsequente expiratione deglutiantur. Erunt hinc potulenta, corpora fluida, quae, ore adsumpta, sensim subsequente expiratione deglutiuntur.

§. II.

Si causas, quae efficiunt, ut omnibus hominibus necessaria sint potulenta, rimamur, facile reperire licet, nutritionem corporis humani & huic inservientem chyficationem ad classem illarum praecipue esse referendam. In vitam primum introire corpus humanum tenerum & infirmum, successu autem temporis evadere firmum & robustum, quotidiana docet experientia. Partibus igitur corporis humani aliquid adponi debet, ut sensim in longum & latum extendantur. Fit haec extensio partium, quoad omnem dimensionem, ope adpositionis fluidissimarum gelatinosarum molecularum portio- nis sanguinis diaphanae, seu ipsius lymphae, quae, poros partium solidarum subeuntes, illis, tanquam corporibus specificè gravioribus, adhaerent, hasque sensim quoad omnem dimensionem expandunt. Ut autem lympa, ad nutritionem partium corporis humani necessaria, praesto esse possit, requiritur, ut fluidum gelatinosum massam intret sanguineam, novumque semper lymphae pabulum praebeat. Tale fluidum gelatinosum constituit chylus, qui ex cibis ingestis & concoctis elicetur. Cum vero cibi chylum praebentes utplurimum solidioris texturae sint, necesse omnino est, ut compa-

compages illorum, si concoqui debent, dissolvatur, & partes inter se arcte cohaerentes separentur, ad facilius eliciendam & separandam gelatinosam in illis contentam portionem.

§. III.

Perfici autem hoc optime potulentis, quae, tanquam corpora fluida (§. I.), interstitiis ciborum solidiorum se insinuando, illorum compagem dissolvunt, exinde satis patet, dum illi, qui sub comestione ciborum firmioris texturac potulenta parcius adsumunt, saburram in primis viis viscidam & sanguinem spissum atque impurum colligunt, ipsamque nutritionem, ob chylum spissiore & parciorem, turbant. Si igitur nulla ab hominibus adsumerentur potulenta, nullus quoque bonus & ad nutritionem aptus ex cibis elici posset chylus, hinc nutritio partium corporis humani turbaretur, immo plane cessaret, & exinde sanitas in morbum & vita in mortem commutaretur. Hac igitur ex ratione potulentorum adsumtionem quibusvis hominibus esse necessariam, nemo, ea quae diximus attentius considerans, ibit inficias.

§. IV.

Regularem & placidum purpurei fluidi, in vasculis corporis humani contenti, motum ad sanitatem requiri, ex physiologicis constat. Non posse autem sanguinis motum existere aequalem, nisi debita illius adsit fluiditas, innumerae vasculorum exilissimorum, per quae sanguis transire debet, myriades evincunt. Sanguine enim spissiore reddito, transitus

illius per vasa minoris diametri impeditur, tollitur inde aequalis ad sanitatem necessarius sanguinis circuitus, hinc aliter fieri non potest, quin sanitas infringatur, id quod plurimi & gravissimi, ex spissitudine sanguinis provenientes morbi, luculentissime testantur. Dum autem potulenta, tanquam corpora fluida (§. I.), maiorem partium sanguinem constituentium cohaesionem imminuunt, fluiditatem exinde sanguinis producant, & hinc regularem sanguinis motum conservant, qui, dum ad sanitatem maxime necessarius est, facile demonstrat, quod potulenta omnibus hominibus necessaria & maxime proficua existant.

§. V.

Certam & determinatam sanguinis reliquorumque humorum *quantitatem* ad sanitatis conservationem esse necessariam, Medicorum scholae uno ore affirmant. Dum enim regularis & aequalis sanguinis circuitus ad sanitatem requiritur (§. praec.), ille autem, sanguinis quantitate vel in excessu, vel defectu peccante, locum habere non potest (per princip. physiol.), sequitur, sanitatem cessare debere, requisito illius necessario sublato. Afferri nostri veritatem permulti iique gravissimi, nimiam sanguinis aliorumque humorum abundantiam vel inopiam subsequentes morbi, luculentius testantur. Si quis igitur magnam fluidorum quantitatem, quae continuo non solum per cutis colatorium, sed etiam per cribrum renale se & excernitur, considerat, is statim perspicere potest, quod sangui-

sanguinis legitima mox deficeret quantitas, omnesque humores e corpore excernerentur humano, nisi illorum iactura quotidie refarciretur. Optime autem id perficere posse potulenta, vel exinde luculenter adparet, quoniam tanquam corpora fluida (§. I.) similes quoque partes massae sanguineae communicant, & hinc illarum defectum, ab excretionibus continuo succedentibus inductum, restitunt. Quoniam igitur sine potulentis proportionata sanguinis reliquorumque humorum quantitas, hinc & sanitas, conservari non potest, magnam exinde illorum necessitatem ad sanitatem mortalium conservandam existere, ex iam dictis abunde satis patere existimo.

§. VI.

Sanguinem bene mixtum & a nimia heterogenearum particularum copia repurgatum ad sanitatem conservandam esse necessarium, Physiologia uberius docet. Produci autem continuo sanguinis, praecipue intestino, motu, partes heterogeneas & sanguinis mixtionem turbantes, non solum ex hominis cuiusvis excretis, sed etiam in morbis, ubi nimium motus intestinalis viget, satis clare adparet. Dum igitur continuo illarum proventu bona sanguinis indoles eiusque mixtio depravatur, & exinde sanitati noxa infertur, necesse omnino est, ut heterogeneae istae partes per congrua loca e corpore proscribantur. Multum autem ad istarum eliminationem potulenta conferre, exinde statim patet, dum ut corpora fluida (§. I.) partes istas heterogeneas

rogeneas in interstitia sua recipere & commode per organa excretoria evehere possunt. Accedit insimul, quod potulenta, dum sanguinis fluiditatem producunt (§. III.), excretiones & partium heterogenearum a massa sanguinea separationem promoveant, & exinde sanguinis bonam mixtionem, ad sanitatem adeo necessariam, conservent. Quaecum ita sunt, luculenter sane adparet, tantam esse potulenta adsumendi necessitatem, ut nullus mortalium citra sanitatis dispendium illorum usum omittere queat.

§. VII.

Uti quibusvis hominibus, ita etiam inprimis *aegrotis* potulenta quam maxime esse necessaria, illisque insignem adferre utilitatem, multis evictum dari potest rationibus. Magnam felicitis aegrorum curationis partem ab eorum usu dependere, pessimus morborum, in quibus potulenta parcius adsumuntur, testatur eventus. Morbos decurrere feliciter, si causa illorum tollitur, exinde satis adparet, dum curatio nihil aliud est, quam causae morbum inducentis remotio. Maxime autem remotionem causarum morbificarum potulentorum congruorum usu adjuvari & promoveri, ex ipsa generali earum consideratione patebit. Si causas morbos inducentes scrutamur, haerent illae vel in solidis, vel in fluidis corporis humani partibus; si prius, morbi producuntur vel ab *atonia*, vel *spastica partium constrictione*; si posterius adest, erit vel *quantitas*, vel *qualitas vitiosa* morborum causa. Pona-

mus

mus igitur, morbum ab *atonia* partium dependere, tunc ea omnia erunt proficua, quae, influxum liquidi nervei in partes promovendo, istarum tonum vividiores reddent. Promovebitur autem influxus liquidi nervei in partes, si libera eius secretio adjuvatur. Adjuvari vero secretionem liquidi nervei potulentis, exinde patet, dum fluiditatem sanguinis producendo (§. III.), uti reliquorum humorum, ita etiam liquidi nervei secretionem faciunt & promovent. Cumque praeterea potulenta partes spirituosas, tonum partium insigniter adjuvantes, continere possunt, illa exinde in morbis ab *atonia* obortis necessaria & proficua esse, nemo, haecenus prolata considerans, negabit. Non solum autem in morbis ab *atonia*, verum etiam a *spasmo* partium solidarum productis, necessaria existunt potulenta. Circulum sanguinis in morbis spasmodicis mire turbari, ex eo statim liquet, dum sanguis per partes spasmo affectas transire nescius, ad alias partes copiosius ruere debet. Cum vero morbus inde magis magisque sustentatur, erunt illa salutaria & necessaria, quae sanguinis motum a spasmodicis turbatum aequabilem efficiunt, dumque potulenta id praestant (§. III.), eorum necessitas sponte adparet. Accedit praeterea, quod potulenta, si spasmi ab acerbis producuntur & foventur recrementis, excretiones promovendo (§. VI.), illorum eliminationem itidem promoveant, ipsisque spasmodicis, si calide praesertim assumantur, eo magis resistere valeant.

§. VIII.

Et morbos a *vitio humorum*, eorumque vel *quantitate*, vel *qualitate vitiosa* productos, feliciter sine potulentis non posse decurrere, specialior illorum consideratio docet. Morbi a nimia sanguinis quantitate oborti non possunt tolli, nisi quantitas illa humorum imminuatur. Imminuitur autem optime excretionum promotione, quam cum potulenta efficiunt (§. VI.), illorum in his morbis necessitas & utilitas sua sponte adparet. Si humorum spissitudo morbos produxit, eo erit adnitendum, ut fluiditas illorum restituatur, cumque potulenta eundem praestant effectum (§. III.), quis illorum necessitatem in morbis, praedictam agnoscentibus causam, in dubium vocabit? Ubi demum acris humorum diathesis morborum causa existit, cessabunt illi, causa hac sublata; cumque potulenta, partium heterogenearum separationem a massa sanguinea promovendo (§. VI.), malam illius diathesin emendant, luculenter istorum necessitas non solum in his, sed etiam in multis aliis praedictis morbis adparet. Possemus etiam, pro ulterius probanda potulentorum necessitate, ad morbos, ubi fervidus humorum motus & calor nimium auctus urget, provocare, ubi sane nec aestus sedari, nec fauces aridae atque exsuccae irrigari, nec excretiones praecipue, ad felicem morborum decursum obtinendum, sine potulentis promoveri possent, sed potius humorum massa in tenax & vix solubile coiret coagulum; nisi Iliada post Homerum nos canere

nere metueremus, cum hoc iam in Dissertat. Dn. D. THAER, sub Praesidio Excellent. b. m. VATERI An. 1732. Wittenbergae habita, *de potus in febribus necessitate*, egregie praestitum fuerit.

§. IX.

Non unius eiusdemque indolis esse potulenta, sed plurimas maximeque diversas eorum dari species, quotidiana edocemur experientia. Non erubimus autem, si eadem in duas dispecsemus classes, quarum priorem *potulenta naturalia*, & posteriorem *artificialia* constituunt. *Naturalia* vocamus *potulenta*, quae sine ulla praegressa praeparatione adsumi possunt: per *artificialia* vero intelligimus ea, quae, certa & peculiari praeparatione praegressa, ad adsumendum idonea existunt.

§. X.

Aquam & lac sine ulla praevia praeparatione, testante experientia, posse adsumi, hinc ad *potulenta naturalia* esse referenda §. anteced. docet. Cum vero reliquae potulentorum species, quo spectant, *cerevisia*, *vinum*, huiusque variae species, *serum lactis* & *ptisanae*, praegressa demum peculiari & convenienti praeparatione ad adsumtionem aptae evadunt, illas ad classem *potulentorum artificialium* pertinere idem ille §. praecedens monstrat. Spectant equidem ad *potulenta artificialia* adeo decantatum infusum herbae Thee & decoctum fabarum Coffee, mirumque videri posset, quod ipsorum non fecerimus mentionem; verum, cum nec in morbis, nec extra illos tanquam ordinaria adhibeantur potulen-

tulenta, sed tantum aliis interponantur, ideo illa in subsequentibus sicco transibimus pede.

§. XI.

Maximam non solum morborum, verum etiam subiectorum istis afflictorum, esse diversitatem, non est quod ambigamus. Quoniam igitur magna (iuxta §. praeced.) potulentorum existit diversitas, hinc congruus illorum delectus, inprimis tum ob morborum, tum ob subiectorum varietatem, utique erit necessarius. Quum vero subiectorum cognitio morborum indagationem praecedere debeat, operae pretium faciemus, si prius, *subiectorum* rationem habendo, disquirimus, quae nam potulenta illis in genere conducant, quam ad considerationem delectus congruorum potulentorum in morbis observandi, nos accingimus. Si ergo ad *subiecta* attendimus, illa potissimum vel *ratione aetatis*, vel *temperamenti*, vel *sexus* considerantur. *Ratione aetatis* dividuntur in infantes, pueros, iuvenes, viros & senes; *respectu temperamenti* occurrunt subiecta cholERICA, melancholica, sanguinea & phlegmatica; *ratione sexus* ad virgines & mulieres praecipue respiciendum est. Nostrum igitur erit, ut paucis, quae nam potulenta horum subiectorum cuivis congrua sint, denotemus.

§. XII.

Nutritionem *infantibus* maxime esse necessariam, dum partes illorum admodum tenerae in dies firmari & magis magisque augeri debent, ipsum partium, quibus gaudent, continuo & brevi succedens

dens testatur augmentum. Erunt igitur potulenta infantibus congrua & proficua, quae copiosiores partes nutritioni inservientes in se continent; & quoniam *lac* eiusque *serum dulce* talibus partibus largiter gaudent, illa exinde infantibus utilia esse & congrua quilibet facile concedet. Hac ex ratione divina constitutum esse providentia mihi videtur, ut teneri infantes e mammis maternis lac, tanquam maxime sibi congruum potulentum, assument; id quod exempla infantum, qui, lactis usu destituti, vel mox ab lactati, debiliores & teneriores partes solidas successu annorum obtinent, luculenter testatum ire possunt. Interim non obtendimus, quod nullum aliud potulentum infantibus, praeter lac, conducat, siquidem in morbis illorum Ptisanæ & aliae potulentorum species optimum praestare possunt effectum; id tantum exinde liquet, quod infantibus in genere, & inprimis extra morbos, potulenta nutrientia, & praecipue lac eiusque serum dulce, sint congrua atque proficua.

§. XIII.

Firmiorem & auctiorem partium solidarum *puerorum* compagem atque constitutionem, quam infantum, annorum successus, corporis incrementum, ipseque testatur adspectus. Congrua igitur illis nequaquam erunt potulenta valde nutrientia, cum partes illorum solidae, iam iam firmiores, non tanta indigent nutritione, quanta in infantibus requiritur. Accedit, quod pueri plus ciborum, quam infantes, possint adsumere & re vera adsumant,

mant, atque exinde materiem ad nutritionem necessariam sat largiter sibi acquirant. Qua de causa proficua pueris erunt potulenta tenuiora, ut cerevisiae secundariae, serum lactis acidulum, ipsaque aqua cum pauxillo vini remixta. Ob adpetitum enim vegetiorem subiecta haec cibis saepius ventriculum nimis replent, adeoque necessarium erit, ut potulentis praedictis, digestionis subvenientibus, bonus chylus, hinc temperati & laudabiles humores & exinde bona nutritio obtineantur. Iam dudum RIEDLINVS *Curat. med. Cent. VIII. Obs. 756. & Lin. med. Ann. II. Mens. Mart. obs. 8.* quibusdam exemplis probare annisus est, in pueris humores viscidos abundare & pituitosos, sique hoc veritati est consentaneum, prout verissimum omnino existit, nova rursus emergit ratio, cur potulenta praedicta, utpote spissos humores attenuantia & diluentia, pueris optime conducant.

§. XIV.

Iuvenes, ob nutritionem parciolem & adpetitus vigorem, ut plurimum laborare plethora & exinde oriundis humorum noxiis commotionibus, haemorrhagiae illis maxime familiares confirmant. Quoniam vero ex illa humorum abundantia peiora mala morbique produci possunt sat graves, in delectu potulentorum ea erunt maxime congrua, quae abundantiam humorum, eorumque impetum, imminuere possunt, cumque hunc effectum potulenta diluta, cerevisiae leves, secundariae, earumque variae species, serum lactis acidulum & aqua
pura

pura fontana, optime praestant, illa exinde iuvenibus, praesertim ad orgasmum humorum dispositis, esse congrua & necessaria, omnes forsitan concedent. Facile etiam nunc liquet, quod, quia *viri*, ob deficiens partium in longitudinem incrementum, pariter ut plurimum plethora laborant, id etiam ratione potulentorum delectus de iis valere debeat, quod de iuvenibus modo diximus. Erraret hinc in totum, qui potulenta valde nutrientia & commoventia his subiectis congrua & proficua esse obtenderet, quorsum cerevisias valde saturatas & pingues, vina eorumque spiritus artificiales referimus, utpote quae, causas morborum augendo & accelerando, plus noxae, quam emolumenti, spondent. Interim ad vitae genus simul erit respiciendum, quod, si mobile & validis obnoxium est laboribus, noxam a praedictis potulentis, praesertim cerevisiis crassioribus, producendam, avertet; hinc ratio potest dari, cur plurimi, licet potulenta prorsus incongrua adsumant, nullum facile detrimentum ratione sanitatis experiantur.

§. XV.

Solidas partes in *senibus* evadere rigidiores, & motum humorum exinde tardiozem & debiliozem reddi, experientia quotidie docet. Non potest igitur aliter fieri, quin massa humorum in his subiectis impura & spissa evadat, ipsaeque excretiones magis magisque imminuantur. Optima exinde & congrua senibus erunt potulenta, quae non solum humores fluidiores reddent, sed etiam, par-

tes solidas ad vegetiorem contractionem leniter stimulando, excretiones promovebunt. Egregie autem hunc praestare effectum vina cum aqua remixta, seu sic dicta lymphata, exinde statim patet, dum pars aquosa humoribus fluiditatem conciliat, & elementa vini spiritiosa, partes solidas ad motum vividiorum stimulando, excretiones promovent. Non immerito hinc vinum, ex omni parte bonum & non nimis generosum, *lac senum* vocatur, quoniam, sicuti lac nutritionem infantum perficit, ita etiam vinum in senibus longaevitatem, vasorum nempe permeabilitatem & humorum fluiditatem conservando, ipsumque calorem naturalem, admodum in illis debilem, suscitando, non parum promovet. Conf. Dissert. inaug. Dn. D. Franc. Anton. GVERING, de Vini intra corpus assumpti usu & noxia, pag. 29. Interim potulenta tenuiora itidem senibus erunt utilia, eum praecipue in finem, ut acrimoniam humorum, illis ut plurimum familiarem, contemperent, imminuant &, excretiones adjuvando, prorsus tollant.

§. XVI.

Si subiecta ratione *temperamentorum* consideramus, prius *cholericæ* nostrae subiiciemus contemplationi, videndo, quatenus potulenta iis convenient. Adesse in his subiectis rapidum & fervidum sanguinis motum, hinc & fortiolem partium solidarum contractionem, Physiologia pluribus docet. Convenientissima igitur illis erunt potulenta, quae non solum velociori partium contractioni resistent, sed

sed etiam humores, multis acribus & sulphureis partibus gaudentes, blandiores reddent, eorumque motum contemperabunt. Talia sunt inprimis aquea, acidulata, & partibus subtilioribus mucilaginosius instructa, nimirum ipsa aqua fontana, serum lactis, aqua cum succo limonum, citri, &c. leniter acidulata, vel pasta amygdalarum subacta, cerevisiae tenues triticeae, &c. quae potulenta nimiam fibrarum tensionem imminuendo & partium sulphurearum copiosum proventum impediendo, his subiectis insigne adferunt emolumentum.

§. XVII.

Praedita esse subiecta *melancholica* fibris densioribus, hinc motum humorum in iis esse tardiorum, praesente simul eorundem spissitudine, Medicis notissimum est. Quoniam vero haec subiecta eandem ferme constitutionem partium & humorum cum senibus habent, illa hinc potulenta, quae senibus conducunt, iuxta §. XV. pariter iis convenire, nemo sane, vel me tacente, negabit.

§. XVIII.

Si subiecta *sanguineo* sic dicto gaudentia *temperamento* consideramus, reperiuntur in illis, iuxta Medicorum asserta, partes solidae nec nimis laxae, nec nimis strictae, & laudabilis humorum mixtio, ob motus vitales placide succedentes. Haec igitur prae omnibus aliis quaevis ferme potulenta ferunt, dum nec mixtio humorum, nec partes solidae, statim alterari & immutari possunt. Verum si quis considerat, quod haec subiecta, ab ipso san-

guine abundante & praedominante ita denominata, humorum copiam alant, & insuper ad eorundem commotiones satis facile disposita sint, statim perspiciet, illis potulenta tenuia, cerevisias nempe secundarias, serum lactis acidulum, & aquam cum vini pauxillo remixtam, quam optime proficua & congrua existere.

§. XIX.

Ab ipso *phlegmate*, seu humoribus aquosis abundantibus, subiecta temperamento sic dicto *phlegmatico* gaudentia nomen suum obtinuisse, inter omnes constat. Esse in his subiectis partes solidas admodum laxas, ipsa humorum aquosorum abundantium consideratio evincit. Posset exinde quis iudicare, nulla potulenta phlegmaticis subiectis esse congrua, dum illorum maxima pars constitutiva aqua est, laxitatem partium augens; verum enim vero, quoniam potulenta etiam talia continere possunt principia, quae non solum partes solidas roborare, sed excretionem simul promovendo humores imminuere valent, nemo sane potulentorum in his subiectis utilitatem poterit in dubium vocare. Congrua igitur erunt phlegmaticis potulenta roborantia, qualia sunt vina generosa, praesertim rubra, & cerevisiae imprimis amarae, utpote quae, partes solidas roborando & excretionem humorum serosorum promovendo, utique ipsis summopere conducunt. Quoniam autem dilutiora potulenta non solum partes hasce relaxant, sed etiam copiam humorum

morum augent, eadem exinde his subiectis plus noxae, quam emolumenti, adferent.

§. XX.

Possent quis ea, quae de congruo potulentorum delectu ratione *temperamentorum* diximus, in dubium vocare, partim nos vitii cuiusdam commissi culpando, quod signa temperamentorum non adposuerimus, partim nos falsitatis accusando, quod potulenta, quae certis temperamentis noxia reputavimus, optime talibus subiectis iuxta experientiam conducere. Ast, quod primum attinet, supponimus omnino iure meritoque aliunde a lectoribus harum paginarum notitiam signorum, quibus temperamenta cognoscuntur, quoniam specialis illorum enumeratio a scopo nostro plane aliena est. Quoad alterum autem, maxime respiciendum erit ad temperamentorum mixtionem, in plurimis subiectis manifesto obviam. Nos enim temperamenta hic sigillatim perlustramus, considerando quaenam potulenta cuilibet eorum conveniant, si simplicia & quasi solitaria illa fuerint; quoniam vero bina temperamenta & plura in uno subiecto existere possunt ac plerumque revera existunt, erit inde iuxta combinationem temperamentorum in subiectis de potulentorum usu iudicandum. Ponamus, in subiecto quodam adesse temperamentum sanguineo-phlegmaticum, tunc potulenta vinosa, in copia non adeo magna solitarie adsumpta, non nocebunt, ob coniunctum phlegmaticum temperamentum, licet subiecto sanguineo in se spectato mi-

nus

nus utique proficua existerent. Si quoque potulentum, subiecto cuidam ratione temperamenti maxime noxium, nullam pareret noxam, adhuc ratio habenda erit consuetudinis, quippe quae, ceu altera natura, noxam, a quadam re certissime alias metuendam, imminuere & prorsus avertere, ipsaque venena in medicamenta potest commutare.

§. XXI.

Denique in delectu potulentorum ad *sexum* praecipue *sequiorem*, dum potioris iam mentio facta est, erit attendendum, quoniam maxima sanitatis pars ab illis dependet. Plurimos morbos in virginibus & foemellis a mensium imminutione vel obstructione originem trahere, Medicis Practicis notissimum est. Ut plurimum autem lernam tot malorum a sanguinis spissitudine oboriri, inde patet, dum sufficienti congruorum potulentorum usu optime haec mala profligantur. Congrua igitur his subiectis erunt potulenta tenuia, quorsum spectant aqua fontana, serum lactis acidulum, cerevisiae secundariae leves & diureticae, atque maiori praesente humorum spissitudine, Ptisanae ex ingredientibus resolventibus paratae, quippe quae si sufficienter adsumuntur, humorum spissitudinem imminuendo, optimum, tollendo frequentiore talem causam morborum sexui sequiori familiarium, praestare possunt effectum pro conservanda sanitate. Et quamvis plurima horum subiectorum aegre potulenta in sufficiente adsumant quantitate, eo tamen erit respiciendum, ut a parciore illorum adsumtio-

sumptione successive magis magisque ad largiorem disponantur usum. Quoniam autem potulenta commoventia minusque diluentia, ut vinum, cerevisiae valde saturatae, &c. humores spissos non attenuant, sed potius irregularem eorum motum & stagnationes inducunt, utique hinc talium usum sexui sequiori magis noxium esse quilibet facile cognosceret.

§. XXII.

Considerato congruo potulentorum delectu quoad subiectorum conditionem, necessarium erit, ut nunc disquiramus, quaenam potulenta *in morbis* congrua existant. Dum vero omnes morbi ratione decursus & periodi in *acutos & chronicos* optime dispescuntur, nostrum erit, ut prius *acutos morbos* lustremus, dispiciendo quaenam in illis congrua sint potulenta, ac postmodum ad contemplationem morborum chronicorum progrediamur. Morbos acutos, eorumque ex numero *malignos exanthematicos*, miasma ad alcalinam magis vergens indolem fovere, unanimi fere consensu Medicorum dogmata evincunt. Produci ab hoc miasmate valde auctum sanguinis intestinum motum, sanguinem nimis dissolventem & eius crasin penitus disturbantem, insignis virium prostratio, pulsus debilis, aliaque testantur symptomata. Congrua igitur & salutaria erunt potulenta, quae non solum motum sanguinis intestinum, hinc destructoriam miasmatis vim, infringent, sed etiam eius expulsionem promovebunt. Nequaquam autem hunc effectum praestabunt po-

tulenta vinosa & commoventia, quippe quae, ob principium spirituosum & volatile, massam sanguinis iam resolutam magis commovendo & resolvendo, motum sanguinis intestinum plus iusto augendo, & miasma subtile diffundendo & multiplicando, finistrum accelerabunt eventum. Interim, sicut nulla regula sine exceptione est, ita ratione vini adsumendi in his morbis respiciendum erit ad debilitatem & consuetudinem: urgente enim virium prostratione & pulsu debili, vini pauxillum, ob analepticam & roborantem virtutem, imbecillitati quodammodo mederi, sique subiectum aegrotans diaetae vinosae adsueta est, vinum praesertim aqua dilutum, solatium & utilitatem adferre poterit. Testatur hoc LINDENIUS, in *Select. med.* pag. 195. *Mater mea, inquit, moratissima & abstinentissima foemina, abstineri a vino non potuit etiam in acutissimis febribus, imo curari nunquam sine vino. Sunt exempla mihi vel centum in promptu; &c.* Conf. *Dissert. inaugur. Excellent. b. m. SCHVLZII, de vino interdicendis.*

§. XXIII.

Neque in his morbis congruae erunt cerevisiae, siue lupulatae, siue triticeae: ob spirituosas enim & sulphureas partes motum sanguinis intestinum, hinc & miasmatis vim, multiplicabunt, ac ob spissiore consistentiam, excretiones retardando, separationem miasmatis ab humoribus impediunt, quo facto fieri non potest, quin morbi hi lethalem fortiantur eventum. Accedit adhuc alia ratio, ob quam potus cerevisiae in his morbis merito dissuadendus

dendus videtur. Constat observationibus Practicorum, cerevisias cum bile acriori, a copia particularum alcalinarum, in his morbis abundante, indurata, confermentare, atque exinde cardialgias sat graves saepiusque diarrhoeas excitari; quoniam autem his symptomatibus humores a peripheria ad interiora pelluntur, hacque ratione excretio peripherica supprimitur & eliminatio miasmatis morbifici impeditur, hinc potus cerevisiae in his morbis noxius erit atque incongruus, dum felicem & salutarem eorum decursum turbat atque pervertit. Nequaquam igitur potus cerevisiae, praesertim spissioris & saturatae, in morbis acutis exanthematicis concedendus erit, nisi summe tenuis & secundaria fuerit, si forsan quoddam subiectum alias potulentorum species ferre non posset. Nec lactis potus in his morbis foret congruus, quod ob laesam digestionem & bilis acrioris praesentiam mox in coagulum abiret gravissimaque excitaret symptomata. Optimus igitur & summe congruus erit potus aquae fontanae, praesertim succo citri acidulatae, ac feri lactis aciduli, quippe quae potulenta, ceu maxime tenuia & levia, aestum sedare, particulas heterogeneas, mixtionem humorum destruentes, in se recipere, immutare atque praeter aliis e cutis colatorio proscribere valent. Nec effectum destituentur exoptato Ptisanæ demulcentes & leniter diaphoresin moventes, ex rad. Scorzon. Cichor. Chin. rasur. C. C. & sem. Foenicul. concinnatae, utpote quae, particulis tenerioribus mucilaginosi miasma involvendo, mo-

tum sanguinis intestinum & destructorium inhibendo, & insimul miasmatis excretionem promovendo, egregium praestabunt effectum.

§. XXIV.

Morbos acutos *inflammatorios*, quo spectant causus, febres synochae, biliosae, pleuritis & peripnevmonia, &c. fervido & rapido sanguinis per vasa circuitu stipari, ipsa symptomatum evincit consideratio. Ad promovendum igitur felicem horum morborum decursum necessarium erit, ut ea, quae staseos inflammatoriae discussionem impediunt, removeantur. Maxime igitur potulentorum delectus erit necessarius ad hunc finem eo felicius impetrandum. Cum enim valido sanguinis motu atque vehementi exinde producto aestu fluidissimae humorum partes consumuntur, lymphæ roscida inquinantur, humores temperati & laudabiles destruuntur, totaque sanguinis mixtio invertitur, potulenta hic maxime erunt congrua, quae non solum fluidissimarum partium iacturam restituunt & aestum mitigant, sed etiam acriores impuritates, a nimio humorum motu productas, corrigunt & evacuant. Omnibus autem his indicationibus satisfaciet potus aquae, imprimis leniter acidulatae, quae tam humores fluidos reddendo & aestum mitigando, quam impuritates acriores in se recipiendo & eliminando, optime ea, quae staseos inflammatoriae discussionem impediunt, removebit. Eundem praestabunt effectum, serum lactis acidulum itemque Ptisanæ hordeaceae & avenaceae, vel similiter acidulatae, vel ex ingre-

dienti.

dientibus mucilaginosi & diaphoresin moderare promoventibus paratae, quae similem corrigentem & evacuantem egregie promovebunt effectum. Sedulo autem in his morbis abstinendum erit a potulentis spirituosus, vinosus & cerevisiariis, ob inde certissime pertimescendum aestus augmentum, spasmodorum incrementum, plenariam humorum laudabilium consumptionem, & ingentem acriorum impuritatum proventum.

§. XXV.

Maxima congrui potulentorum delectus, in morbis acutis, inflammatione simul ventriculi & intestinorum, a bile acri & corrupta inducta, vel imminente, stipatis, necessitas per se adparet. Exemplo inservire possunt causus, febres biliosae, dysenteria, &c. quorum affectuum causa bilis corrupta, acris & caustica ut plurimum existit. Funestus certe horum morborum existeret decursus, si quis potulenta vinosa & spirituosa aegrotis talibus praebere vellet, quoniam talia acrem & corrosivam bilem, tunicam ventriculi vel intestinorum nerveam graviter arrodentem, acriorem omnino redderent, spasmos & inflammationem augerent, ac stasim denique lethalem producerent. Similis a cerevisiis esset expectandus effectus, quoniam cum bile acriori fermentando causticitatem illius acuerent, sitim immodicam non exstinguerent, cardialgicos dolores augerent & ominosum tanto certius accelerarent eventum. Ea igitur tantum congrua erunt potulenta, quae bilem corruptam & causticam diluere, corri-

gere & ad excretionem disponere possunt. Optime autem id potus aquae, praesertim frigidiusculae, perficiet, utpote quae, ob fluiditatem, aridas fauces optime humectat, sitim molestissimam clamorosa restinguit, aestum igneum temperat, & acrimoni-
am bilis diluit ac infringit, corruptumque hunc humorem excretioni aptum reddit, prout hoc exempla varia, de salubritate potus aquae frigidulae in his morbis, uberius testantur, qualia inprimis occurrunt in *Act. Nat. Cur. Dec. II. An. IX. Obs. 53. p. 84. & Obs. 176. Schol. p. 337. it. Dec. II. An. X. Obs. 139. p. 228.* Eandem quoque utilitatem praestant Ptisanae, ex rad. Scorzon. Cichor. rasur. C.C. flor. Papav. rhoead. & sem. Foenicul. paratae, gelatinae liquidiores, emulsionem dilutae & serum lactis, quae idcirco simplicis aquae usui vel interponi, vel substitui etiam possunt.

§. XXVI.

Morbos, qui ratione decursus chronicis morbis breviores, & respectu periculi sic dictis acutis mitiores sunt, *febres* nimirum *continuas*, *lentas* & *hecticas*, massam humorum acrioribus inquinatam impuritatibus pro causa agnoscere, Pathologia pluribus demonstrat. Oriri exinde & adesse in his morbis magis auctum sanguinis motum intestinum, temperatos succos vitales magis acres reddentem, eorumque mixtionem turbantem, non solum calor gliscens siccus & depascens, obrusi capitis dolores, faucium ariditas & sitis auctior, sed etiam successiva partium emaciatio & affectus cutanei pruriginosi, luculen-

culenter testantur. Nequaquam igitur potulenta vinosa congrua erunt & concedenda in his morbis, dum succos expandunt, sanguinis motum, & praecipue intestinum, auctiorem reddunt. Felix igitur horum morborum decursus ab adhibitis vinosis potulentis non erit expectandus, quoniam causam eorum magis augent, quam minuunt. Neque etiam potus cerevisiarum in morbis hisce locum inveniet, siquidem, siue sint amarae, siue dulces, siue spissiores, siue leviores, siue fusci, siue albi coloris, ob partes heterogeneas, quas in sinu suo fovant, humores iam iam impuros magis inquinabunt, & ob vim commoventem, praecipue si amarae, ac spissioris sunt consistentiae, motum humorum augebunt, plures impuritates producent & indolem horum morborum deteriorem reddent. Et quamvis leves & tenuiores cerevisiae minus noxiae in his morbis videantur, caute tamen cum illis erit mercandum, dum, ob feculentas impuritates & motum fermentativum, multa circa primas vias incommoda, inflationem nimirum abdominis, ruetus, cardialgias, tormina, alvi fluxus & alia fontica symptomata, excitare solent. Congrua igitur in his morbis erunt potulenta, quae non solum motum humorum, praecipue intestinum, infringere, sed etiam acriores humores praesentes demulcere & ad excretionem aptos reddere possunt; cumque aqua, serum lactis acidulum, emulsiones dilutae & Ptisanae demulcentes, hunc praestent effectum (§. XXIII.), quilibet sane istorum utilitatem in his morbis concedet.

§. XXVII.

Brevibus considerato congruo in morbis acutis potulentorum delectu, ordo & necessitas postulat, ut *chronicos* consideremus *morbos*, inquirendo, quatenam ibi conducant potulenta. Quoniam autem omnes & singulas illorum species perlustrare, nec nostrum institutum, nec limites nostrae Dissertationis permittunt, ideo potiores tantum in genere, iuxta considerationem causarum, a quibus morbi chronici producuntur, foveantur & sustentantur, attingemus. Si ergo causas horum morborum scrutamur, deprehendimus illas vel in *partibus solidis*, vel *fluidis* earumque motibus vitiatis; hinc adsunt vel *atoniam*, vel *spasmus*, vel *humorum nimia abundantia*, vel *spissitudo*, vel *depravatio*, quae vel a viscerum obstructione, vel laesione ulceratoria, vel ingestorum & excretorum vitio originem traxit. Quoniam igitur hi morbi eximie omnino inter se differunt, minime idcirco unum idemque potulentum in iisdem congruum erit, unde, quatenam cuilibet illorum classis magis conveniant, paucis videbimus.

§. XXVIII.

Febres intermittentes ad morbos pertinere *chronicos*, sat diuturna saepius illarum duratio & rebellis pertinacia testatur. Atoniam primarum viarum plus minusve auctam, impuritatum proventui & hinc paroxysmis ansam praebendo, illas producere, non solum causae procatarticae, sed etiam remedia has febres demum profligantia, comprobant. Massam humorum in illis tam ob succos deprava-

depravatos, ex officina digestionis provenientes, quam ob motuum in paroxysmis augmentum, impuram reddi, excretiones copiosiores, quibus feliciter terminantur, evincunt. Ad removendas ergo impuritates, & excretiones promovendas, quaevis potulenta non erunt congrua, dum magna & subiectorum & febrium existit diversitas, sed potius illorum delectus, praecipue iuxta tempora decursus, quem servant, erit instituendus. Initio igitur horum morborum, ubi primae viae sordibus turgent, incongrua erunt potulenta vinosa, spirituosae & commoventia; impuritates enim primarum viarum bilioso-acres in se recipiendo, & per massam sanguinis diffundendo, humores magis magisque inquinabunt, insimulque ob partes sulphureas & spirituosas motum humorum, praecipue intestinum, augebunt, acrimoniam humorum maiorem reddent, & sic occasionem subministrabunt, ut facile dein tales febres simplices & regulares in continuas & anomas transeant, prout hoc confirmant *Aët. Nat. Cur. Dec. III. Ann. I. Obs. 67.* Multo minus autem congrua erunt haec potulenta sub paroxysmis; humores enim expandendo, eorum motum accelerando, aestum & sitim exasperando, maximum adferent aegrotis detrimentum. Neque lactis usus in initio harum febrium erit concedendus, quoniam, ob impuritates primarum viarum acres vel acidas, facile in coagulum abire, & gravissima, teste experientia, excitare potest symptomata. Minus pariter congruae erunt cerevisiae qualescunque, in primis minus defecatae, dum impuritates & atoniam primarum via-

rum magis augent (§. XXVI.). Confirmat hanc earum insalubritatem inprimis RIEDLINVS, dum *Lin. Med. Ann. I. M. Ianuar. Obs. 31. pag. 32.* Ego sane, inquit, quantum cerevisiae potus (nimirum in febribus) noceat, saepius iam cum cordolio meo vidi, & adhuc quotidie videre cogor; sic Pharmacopoei cuiusdam uxor sexies vel septies in febrem intermittentem de novo incidit, solum quia a cerevisia omnino abstinere nolebat; eam enim deinde per mensem, & quod excurrit, seponens, sine alio remedio a febre penitus liberata fuit. Optima igitur in initio harum febrium erunt potulenta, quae impuritates primarum viarum & sanguinis acres involvere, earum excretionem promovere, & sanguinis motum, praecipue in paroxysmis, fervidum attemperare possunt, qualia sunt aqua taleolis citri, vel pane tosto, quadantenus correctae, serum lactis acidulum, ptisanae ex hordeo vel avena, &c. paratae, & cerevisiae secundariae non nimium recentes vel vetustae, nec feculentae, sed potius repurgatae & tenuiores. Impuritatibus quoad maximam partem remotis, & febribus declinantibus, congrua erunt potulenta atoniae viscerum succurrentia, ut aqua cum corticibus Cinnamomi vel Citri leniter decocta, vel vino praecipue rubro permixta, Ptisanae ex ingredientibus roborantibus & aromaticis paratae, ipsumque vinum parcius tantum adsumendum, quippe quae potulenta, partium tonum vividiores reddendo, non solum in his morbis, sed etiam in aliis ab atonia dependentibus, causam illarum removendo, congrua existunt.

§. XXIX. Morbos spasmodicos & dolorificos, ob turbatum humorum circuitum & excretionum successum, humo-

humorum iniquationem & partium solidarum debilitatem producere, Pathologia docet. In delectu igitur potulentorum respiciendum erit, an spasmi adfligant, necne? Praesentibus spasmodicis congrua erunt potulenta demulcentia, ut Ptisanæ ex ingredientibus antispasmodicis & mucilaginosi paratae & calide adsumtae, itemque serum lactis dulce. Silentibus illis, potulenta erunt proficua, quae non solum humores impuros corrigere, sed & solida a spasmodicis debilitata leniter roborare possunt, qualia sunt aquae minerales, vina lymphata & ptisanæ ex solventibus & roborantibus, veluti rad. Cichor. Chin. Sarsaparill. Scorzoner. herb. Marrub. alb. Meliss. citrat. Cort. Lign. saffra. Citri & sem. Foenicul. paratae. Interim vina, solitarie & copiosius hausta, non erunt congrua silentibus vel vigentibus spasmodicis; in priori enim casu, humores valde commovendo & expandendo, spasmos invitabunt; in posteriori, circuitum humorum iam inaequalem redditum magis augebunt, & partium constrictionem, ob principium spirituosum, vel alia contenta, magis promovebunt. Minus congruae pariter erunt cerevisiae, dum humorum impuritates augendo & vitia digestionis inducendo (§. XXVI.), causas horum morborum graviores potius, quam mitiores, reddent.

§. XXX. Morbos, *visceris cuiusdam labem*, vel eius *obstructionem*, vel *ulcerosam corruptionem* pro causa agnoscen-tes, feliciter decurrere & terminari his causis sublati, experientia testatur. Optima igitur & maxime congrua in morbis ab obstructione viscerum dependentibus erunt potulenta, quae referantis & aperientis sunt virtutis; & quoniam aquae minerales, vina lymphata, ptisanæ ex solventibus paratae, & serum lactis, humores fluxiles reddendo, impuritates stagnantes & impactas diluendo, simulque motum partium solidarum vividiores reddendo, multum ad apertionem vasculorum

lorum obstructorum conferunt, utique exinde illorum necessitas & utilitas facile patet. Ubi vero ulcerosa visceris corruptio in culpa est, congrua erunt potulenta abstergentia & roborantia, ut aqua Selterana, serum lactis acidulum & ptisanæ, ex rad. Chin. Consol. maior. Cichor. herb. Sanicul. Virg. aur. Heder. terrestr. summit. Millefol. rasur. lign. Sassafr. Lentisci, &c. concinnatae. Locum vero haud invenient potulenta valde commoventia, aut saturata, dum priora, praesente iam obstructione, spasmos & irregularem humorum circuitum producent, sique ulcus forsitan praesto fuerit, febrem lentam & aestum depascentem accelerabunt; posteriora vero humores spissos & impuros reddendo, nullam utilitatem, sed potius noxam insignem conciliabunt.

§. XXXI. Morbos denique vel ab *humorum copia & spissitudine*, vel *acrimonia* dependentes, adpropriata & congrua requirere potulenta, consideratio diversitatis caussarum testatur. Ubi igitur *spissitudo* in culpa est, congrua erunt potulenta, quae cohaesionem partium sanguinis maiorem impediunt, & motum sanguinis vividiores reddunt, qualia sunt, aquae fontanae leviores, itemque minerales, pauxillo vini permixtae, serum lactis acidulum & Ptisanæ resolventes. Si *acrimonia* humorum praesto est, mitigabunt illam potulenta demulcentia & dilutiora, quorsum spectant lac cum aqua permixtum, serum lactis dulce, Ptisanæ ex avena vel hordeo &c. paratae, aliaque gelatinosa potulenta. *Abundantiae* humorum tandem, reliquis non neglectis congruis praesidiis, optime medentur potulenta tenuia & diluentia, praecipue aqua fontana & serum lactis acidulum, quae potulenta spissitudinem humorum & cacochymiam, a plethora facile producendam, avertendo, sicque insimul excretiones conservando & promovendo, optime in humorum copia excedente conducent. Quoniam vero potulenta vinosa, spirituosae, & saturata motum humorum nimis acclerant (§. XXVIII.) spissos & impuros humores producant (§. XXVI.) ideo nequaquam in his morbis convenerint. Haec itaque sunt, quae circa *congruum potulentorum delectum*, in *morborum curatione admodum necessarium*, observanda esse iudicavi. Plura quidem adiicienda adhuc restare fateor; at, quoniam plenior istorum, quae paucis attigimus, cognitio & explicatio tum in Dissertationibus superius allegatis, tum in aliis Practicorum scriptis hinc inde occurrit, pedem hic figimus & tractationi huic nunc imponimus FINEM.

Nun so folgt auf Dein Bemühn, Freund! den selbst Hygea liebt,
Weil Du Dich in ihrer Kunst als ein ächter Sohn geübt:
Der schon längst verdiente Preis, die Belohnung Deines Fleißes,
Die Vergeltung Deiner Müh' und des oft vergoßnen Schweißes.
Nimm nun hin den Lorbeer-Kranz, den die holde Göttin reicht,
Nach dem Du mit Fleiß gestrebt, der leicht keinen andern gleicht;
Nimm ihn nur mit Freuden an; denn die vielen sauren Stunden,
Die Dir selbiger gemacht, sind nun, freue Dich! verschwunden.
Nun so wünsch' ich Dir viel Glück, zu den neuen Ehrenstand;
Höchster segne diesen Freund! leite Ihn mit deiner Hand.
Hilf den Kranken, stärke sie, tilge stets Morbonens Lücke,
Denke aber auch manchmahl an mich, Deinen Freund, zurücke.

Johann Christian Hildebrand, Opponent.



